



Aningaaserivimmik, kalaallinik tamakkiisumik amerlanerussuteqartunilluunniit pigineqartussamik, pilersitsinissamut periarfissanik nalunaarusiornissamut Naalakkersuisut peqquneqarnissaannut Inatsisartut aalajangiiffigisassaattut siunnersuut. Nalunaarusiaq ukioq 2025 aallartinnerani Inatsisartunut agguanneqassaaq.

(Inatsisartunut ilaasortaq Jens Napaattooq, Naleraq)

(Siullermeerneqarnera)

Qujanaq siunnersuummut.

Nunatta pisariaqartipaa namminersortut suliniartut amerlanernit aammalu suliffeqarfiit namminersortunik inuussutissarsiortunit pigineqartut amerlanerit. Suliffeqarfinnik pisortanik pigineqartunik amerlanerit pisariaqartitsinngilluinnarpugut. Aammalu pisariaqanngilluinnarpoq pisortat suliffeqarfiutaani immikkoortuni, namminersortunit ingerlalluurtunit pigineqareersuni pilersitsinissaq. Tassani aamma pineqarput, aningaaserivinnut tunngasut.

Demokraatini suliniarpugut, namminersorlutik inuussutissarsiuteqartut amerlissasut, isumaqarpugullu, taanna aqqut eqqortoq ataasiinnaasoq aningaasaqarnermik pilersitsinissaq namminiilivinnissamik periarfissiisoq. Naleqqap uani siunnersuummi tunngavilersuutigai akerlerluinnai – tassalu aningaaserivik pisortanik pigineqartoq namminiilivinnissamut apeqqutaalluinnartussatut. Tassanilu nassuerutiginnassavarput, imminut assortuuttumik inissisimanerput.

Uagut isiginnittaaserput malillugu aningaaserivik pisortanik pigineqartup kingunerissavaa, Namminersorlutik Oqartussat pisariaqanngitsumik aningaasanik navianartorsiussasoq, akileraartartunut iluaqutaanngilluinnartumik. Soorlu assersuutigalugu aningaasarliortoqalissagaluarpat assigisaanilluunniit, Namminersorlutik Oqartussat tassalu akileraartartut, annaaneqartussat aningaaseriviup pisortanik pigineqartup matussusertussaassammagit.

Taakku saniatigut pingaartuuvoq eqqaamassallugu, suliffeqarfiit namminersortunit pigineqartut taakkunanilu aningaaseriviit tununiaanermik, unammillernermik, pisaariillisaanermik, sinneqartoornermillu ingerlassuteqarput, taakkulu qulakkeertarpaat pitsaanerpaamik siuariartornissaq aningaasartuutikillisaanerlu. Aningaaseriviup pisortanik pigineqartup anguniagaasa taakku imaassinnaavoq assiginngikkai, taamaattumillu pisariusumik ingerlatsinermik, pisortaasunit ingerlatsinerlunermik politikikkullu akulusimanermik ingerlatsinermut tunngasunik kinguneqarsinnaalluni. Taakkua kingunerisinnaavaat aningaasatigut sullissinerup pitsaassusaata apparnera aammalu niuernerit allannguutaannut naleqqussartarnerup kigaannerulerneranik.

Nattagaatigullu aamma uparuaqqittariaqarpara, unammilleqatigiinnermut naleqatigiinngitsitsisinnaammat



pisortat pigisaannik aningaaseriveqarneq. Tamannaq ajorluinnassaaq ullumikkutut, aningaaserivinnut namminersortunit pigineqartunut.

Taamaattumik Demokraatit isumaqatiginngilluinnarpaat, pisortanit pigineqartumik aningaaseriveqalernissaq, tunngavissaqanngilluinnartutullu isigalugu aningaasanik atuinissaq, taanna pisariaqartinneqarnerisooq misissuisitsinermut.

Taamatut oqareerlunga, uparuartariaqarpara, amerlasuunut aningaaserivinni atuisuuneq akisoorujussuummat. Erniat qaffasittorujussuupput aammattaarlu akitsuutit. Suli akisuneruvoq innuttaasunut nunaqarfinni isorliunerusunilu, suliffeqarfinnik pilersitsinissamut taakkunanilu piffinni siuariartornissaagaluamut akimmisaarutaallutik. Ajornartorsiut annertoorujussuuvoq, tamakkiisumik miserratiginngisara aammalu avaangugerujussuagara. Tamannali ajornartorsiut pisortanit pigineqartumik aningaaseriviliornikkut aaqqinneqarsinnaanngilaq.

Siunnersuut taamatut oqaaseqaatitalerlugu itigartinneqarnissaa innersuunneqarpoq.